

Incwadi KaThisha

IBhayibheli Lami Lokuqala

Umgomo

Ukukhuliswa kolimi kwenzeka uma kugxilwe ekulandeleni nasekusebenziseni imigomo eyiyo yolimi. Ukuzimisela nokukhuthala kwabafundi kubalulekile ukuze bakwazi ukulukhuluma nokulusebenzisa ngendlela eyiyonayona. Uthisha nomzali kubalulekile ukuthi bakhombise ukukhuthalela konke abafundi abakukhulumayo nabakubhalayo. Uma uthisha efundisa kubalulekile ukuthi abafundi bayazi injongo nenhloso yaleso naleso sifundo.

Izifundo ezisencwadini yomfundi zihlelwe zalungiswa ngendlela yokubhekelela iminyaka yabo. Siphinde futhi sasebenzisa amagama abazosheshe bawaqonde abafundi ezindaweni lapho ngibone khona ukuthi amagama asetshenziwe aqine kakhulu ukuthi abantwana bangasheshe bawaqonde. Ungaphinda futhi ubafundele abafundi indaba yonke njengoba injalo eBhayibhelini ukuze bathole isithombe esiphelele sendaba.

Nansi imiphumela yezifundo okulindeleke ukuthi abantwana bayazi emva kwaleso naleso sifundo:

- Ukukwazi ukufunda nokuphimisa onkamisa nongwaqa.
- Ukukwazi ukusebenzisa iziphumuzi uma befunda nokusebenzisa amehlo abo omqondo ngokwenzakalayo.
- Bakwazi ukufunda banyuse futhi behlise iphimbo.
- Ukubanika umsebenzi ozokwazi ukulola imiqondo yabo.
- Bakwazi ukuxoxa indaba akade beyifundelwa ngokwabo
- Ukulalela ngokucophelela
- Ukufunda ngokucophelela
- Ukubhala ngokucophelela
- Ukuziqoqela ulwazi-magama (isichazamazwi)
- Ukukwazi ukuhlanganisa baqondanise isithombe nalokho esikushoyo nesikuchazayo
- Bakwazi ukubona izinto ezifanayo nalezo ezingafani
- Ukukwazi ukudlulisa umyalezo

Landela imihlahlandlela!

Izithombe ezingezansi zisiza uthisha nabafundi ukuze bakwazi ukulandela imiyalelo yaleso naleso sifundo.



Umsizi/uthisha —
Uyabafundela futhi acacise.



Buka — Abafundi babuka
amagama.



Ipensela — Abafundi
bayabhala.



Khuluma — Abafundi
baphinda amagama noma
baphendule imibuzo.



Funa uthole — Abafundi
babheka bathole amagama.



Ipensela elinombala —
Abafundi bayadweba
bafake imibala.



Asisebenze — Lolu
phawu luveza umsebenzi
womfundi.



Ukushaya izandla —
Abafundi bashaya izandla
babale.



Ukuthikha — Abafundi
bathikha izimpendulo
abazitholile.

Isifundo 1 – Onhlamvunye

Le ncwadi ilungiselelwe abantwana abaneminyaka esukela kwemihlanu ukuya kweyisikhombisa. Abazali nothisha bakaSonto-sikole bavumelekile ukubasiza nokubalekelela abantwana bakwazi ukufunda. Lapha abantwana banikwa ithuba lokufunda imisindo nendlela ebizwa ngayo. Lokhu kwenzelwa ukuthi abantwana bakuthole kulula ukufunda isiZulu. Amagama amaningi angonhlamvunye ngamagama iningi lawo atholakalayo eBhayibhelini. Imisindo ibhalwe yaba ngofeleba (osonhlamvukazi) kanye nezinhlamvu ezincane.

Thisha/Msizi

Inhloso yalesi sifundo ukufundisa abantwana imisindo, okungongwaqa kanye nonkamisa. Bafundise abantwana le misindo, bese bewabhala onke amagama. Mababhale imisindo beqala ngohlamvu oluncane bese begcina ngosonhlamvukazi.

Abantwana bahlalise ngokweminyaka yabo. Abasebancane kakhulu abasaqala isikole mababhale laba onkamisa: a, e, i, o, u. Abababhale babaphindaphinde labo nkamisa baze babajwayele.

Isifundo 2 – Onhlamvumbili

Uma abantwana ezinkonzweni bebewa ngokweminyaka, uthisha makaqinisekise ukuthi bayasizana ukufunda amagama amasha. Uma sebeqedile ukufunda imisindo engonhlamvunye kwisifundo sokuqala, sidlulela konhlamvumbili nonhlamvuntathu ngendlela esiwabiza ngayo amagama esiZulu ukwenzela ukuthi kube lula ukuwafunda. Bakhuthaze abantwana ukuthi bakhe awabo amagama besebenzisa imisindo asebeyifundile futhi bayiphimise ngemilomo yabo leyo misindo, emva kwalokho bayibhale phansi.

Thisha/Msizi

Bakhuthaze abafundi babhale imisho ngamagama abawafundile ukuqinisekisa ukuthi bayawaqonda.

Isifundo 3 – Yimi lo

Abafundi bakhuthazwa ukudweba ukuze babe nokuzethemba. Qaphela thisha ukuthi awukho umdwebo olungile nongalunganga. Yonke imidwebo kubalulekile ukuthi uyincome. Babhala imininingwane yabo yonke besizwa ngothisha, abazali nabafowabo nodadewabo emakhaya. Bakhuthaze abafundi ukuthi bacele usizo emakhaya ngomsebenzi obanikeze wona.

Isifundo 4 – Indalo kaNkulunkulu

Abafundi bafundiswa ngendalo kaNkulunkulu. Bafundise ukubheka isithombe, babhekisise negama. Abawafunde onke amagama, emva kwalokho baqale ukubhala amagama ngemisindo abayinikiwe: Isibonelo -

nd – indoda

ny – inyanga

ng – ingelosi

Isifundo 5 – Umthandazo wabantwana

Nika abafundi ithuba lokusho izinto abafisa ukuzithandazela.

Thisha/Msizi

Abafundi ababheke amagama anemisindo engu-Ss kanye no-Yy esifundweni. Banike ithuba lokuthi bafake nawabo amagama aneminye imisindo abawathole endabeni.

Isifundo 6 – Umkhumbi kaNowa

Thisha/Msizi

Abafundi abaxoxe ngesithombe somkhumbi kaNowa. Badedele baxoxe ngokukhululeka. Mhlambe abanye bake bawubona kumabonakude.

Isifundo 7 – Uzamcolo

Thisha/Msizi

Abafundi abacabange zonke izilwane ezifuywayo ekhaya kanye nalezo zasendle. Bakhuthaze ukuthi badwebe noma isiphi isilwane abathanda ukusidweba.

Isifundo 8 – Yayeka ukuna imvula

Abafundi abakhulume ngobuhle nobubi bemvula. Bakhombise uthingo lwenkosazane nemibala yalo, bachazele ukuthi luvela uma kunjani. Abafundi abadwebe uthingo lwenkosazane bafake yonke imibala yalo.

Isifundo 9 – Umsebenzi wokubala

Thisha/Msizi

Bafundele abantwana ube ubakhombisa isithombe esiyinani lalokho okufundayo. Funda ngesineke uqikelele ukuthi bayakuzwa uphimisa izinhlamvu zokubala. Uma sewubale waze wafika kokuhlanu (kade ubakhombisa inani lalokho okufundayo), bacele nabo basho emva kwakho nize nifike kokuyisihlanu. Qikelela ukuthi bayasijabulela lesi sifundo. Ningazisho futhi izinombolo zibe samlolozelo ukuze bajabule.

Isifundo 10 – UMose utholwa emanzini

Abantwana abakhulume ngesithombe sikaMose. Bavumele baxoxe ngempilo kaMose. Ungabakhuthaza ukuthi benze nomdlalo ngempilo kaMose, bethathela ezithombeni.

Isifundo 11 – UMose ukhipha abantwana bakwa-Israyeli eGibithe

Bakhuthaze abantwana ukuthi badwebe ubuso obujabule nobuso obukhathazekile. Khumbula ukuthi awukho umdwebo ongalungile.

Abantwana ababhekisise imidwebo yomibili bathole futhi baveze izinto ezingumehluko phakathi kwemidwebo yomibili. Banike isikhathi esanele sokuthi bathole izinto ezifanayo nezingafani emidwebweni yomibili. Zama ngayo yonke indlela ukuthi abafundi bawujabulele lo msebenzi. Mabazikokelezele izinto ezingefani.

Isifundo 12 – Imithetho eyishumi

Thisha/Msizi

Bavumele abantwana bayihaye samulolozelo imithetho eyishumi, bazame ukuveza ukuthi bayayiqonda ukuthi isho ukuthini. Banike umthetho ube munye, bese beyaqagela ukuthi ungowesingaki. Qaphela ukuthi yonke le nto bayenza ngokuyijabulela.

Isifundo 13 – UDavide ungumelusi wezimvu

Emva kokufunda indaba ngoDavide ezincwadini zabo, abafune bathole izimvu zikaDavide ngokulandela umugqa ongena esibayeni. Basize thisha bangashayisi odongeni. Bazowujabulela kakhulu lo msebenzi.

Isifundo 14 – UDavide ulwa nendoda eyisidlakela

Bafundele indaba yesidlakela esinguGoliyati. Baphendule imibuzo ngesifundo. Banikeze ithuba lokulingisa nokuveza izidlakela zikaGoliyati. Emva kwalokho bazobheka amagama akwisiphicwaphicwano.

Hlola ulwazi lwabo:

Banikeze ulwazi olungesilona iqiniso, umfanekiso:

UGoliyati wayemncane kakhulu. Wayenenhlonipho, enesizotha futi elungile. Abantu babemthanda uGoliyati. Bakhuthaze abafundi ukuthi bakunikeze ulwazi nezibonelo eziyizo ngoGoliyati njengoba kubhalwe eBhayibhelini.

Isivivinyo

Akhona amagama aphelele abhalwe kwiphazili, banike abafundi ithuba lokuwafuna. Khumbula ukuthi kusenokubathatha isikhathi eside ukuwathola la magama. Yiba nesineke baze bawathole. Ungakhohlwa ukubancoma uma sebewatholile.

Isifundo 15 – UDaniyeli nezingonyama

Bafundele indaba ngoDaniyeli, bese bephendula imibuzo babheke ezithombeni. Bakhuthaze ukuthi babhale amagama abhalwe ngamachashaza ezincwadini zabo zokubhalela.

Isifundo 16 – Ukuzalwa kukaJesu

Abafundi ababhekisise konke okusezithombeni. Abadwebe indilinga kulelo nalelo gama asebelitholile esithombeni.

Isifundo 17 – Izazi zeza nezipho

Mabaxoxe ngezipho ezaphiwa uJesu yizazi, okuyilezi:

Igolide

Amakha

Inhlaka

Bakhuthaze abafundi ukuthi babuze kubazali babo ukuthi yini amakha nehlaka.

Isifundo 18 – Izithombe ngokuzalwa kukaJesu

Hlola ulwazi lwabo:

Sebenzisa ishadi lezithombe kanye namagama. Abafundi mabaqondanise amagama nezithombe eziwachazayo. Bavumele balekelelane ukuze bakuthokozele ukuhlolwa kwabo.

Isifundo 19 – UHerode ufuna ukubulala umntwana uJesu

Balekelele abafundi bathathe umntwana uJesu baye naye eGibithe emdwebeni.

Isifundo 20 – UJesu wenza umsebenzi kaNkulunkulu

UJesu uthanda wonke umuntu. Bakhuthaze abantwana bakhulume ngendlela abathanda ngayo uJesu. Mababhale umusho othi: UJesu uyangithanda.

Emva kwalokho babhalele impendulo bese beyazihlola besizana.

Isifundo 21 – UJesu usifundisa ukuthandaza

Bafundise abafundi ukukhuthalela ukuthandaza njengoDavide. Abafundi abawufunde bawazi ngekhanda lo mthandazo. Bafundise umthandazo weNkosi othi “Baba wethu osezulwini”.

Isifundo 22 – UJesu uyedlula emhlabeni

Bafundele indaba ungayisheshisi. Babuze imibuzo efana nalena elandelayo:

1. Wafela kuphi uJesu na?
2. Ngabe umzimba kaJesu usesethuneni yini namanje na?
3. Ngabe wavuka ngemva kwezinsuku ezingaki uJesu na?
4. Ngabe wahamba ngani uJesu ukuya ezulwini na?

Abafundi mabadwebe isithombe sesiphambano.

Isifundo 23 – Ukucula

Babuze imibuzo ngaleli culo:

1. Ngabe likhuluma ngobani leli culo na?
2. Ngabe lisifundisani thina leli culo na?

Thisha/Msizi

- Bakhuthaze abantwana bazame ukucula leli culo ngesigqi seculo elithi “Waklazulwa ngenxa yami”. Baculele wena leli culo ukuze bezwe indlela eliculwa ngayo.
- Akuxoxwe ngokubaluleka kwemfundo nobuhle bokufunda. Banikeze ithuba lokuthi bonke bakhulume kule ngxoxo. Khumbula ukuthi ayikho impendulo elungile noma engalungile, inhloso nje ukuthi abafundi baveze imibono yabo.